

Jaorverslag V.V. De Spurriemök seizoen 2023-2024

Ut jaor van:

- Prins Stan d'n Urste mit zien prinses Dione, ma ge mogt ok Dioën zegge
- Jeugdprins Merlijn d'n Urste en Jeugdprinses Sam de Urste
- Ut jaor van de recepties
- Ut jaor van de pizza's
- Ut jaor van "Sha-la-la-la-la"
- Ut jaor dat we nie won gaon, we nie lang zun blieve en we zoë wer weg zun zien
- Ut jaor van: "Ok, nog iëne dan"
- Ut jaor van de neje valuta BHP, oftewel boekhoudpakette
- Ut jaor van Bumsbar, L1 en L2, UCHE, soës, schijfphoto's en nog veul mier
- En natuurluk ut jaor van wer un fantastisch vastelaovesseizoen

Ut bestuur bestoond uut:

- Vurzitter Robert Steeghs
- Vorst Jop Loonen
- Penningmèster Stijn Nelissen
- Sik Sander Peeters

En de bestuursleje . . . Marc van de Ven, Toffel Gommans en Daan Willems

De Raod van Elluf bestoond dit jaor uut:

Pascal Classens, Fred Peeters, Roel Steeghs, Mark Steeghs, Rob Kunkeler, Han van de Sande, Paul Geurts (teves aspirant-bestuurslid), Wilbert Steeghs, Joep Willems en Willem Lemmen

De dansmariekkes ware: Renske Zanders, Judith Steeghs, Linda Willemsen en Amber Brugmans

11-11 begos ut seizoen, en volledig volges de tradisie van de lèste jaore hebbe wej op op dizzen dag niks georganiseerd, umdat d'r aoveral um os hin veuls te veul te doen is. Wat we dit jaor wel hebbe gedaon, is naor Rooj gaon. Helaas han we daar vrejkaarte vur gekrege, en zoë gebeurde ut dat zelfs Vorst Jop op de f... naor Rooj is gewist. Naodat wej d'n Harley Trapson han geparkierd ginge we, volges sommige 3 uur te laat, naor ut schouwburgplein, waor d'r unne hiële hoëp artiëste stoonde, eigeluk alles behalve de groëte, ma wel John Tana. Ut was eik wel gezellig, en gedurende de middag krege we steeds dukker te hure dat Bas Custers prins zeuj werre ien de Landwiert, ondanks dat hej nog gewoën op ut plein stoond. Mar uiteindeluk was hej d'r toch stiekem tussenuut geknepe en wier hej prins van de Piëlhaan. Ok, we gaon wel ekkes, ma we blieve nie lang. Uiteindeluk was ut toch alwer unne neje dag toen de lèste bej Mark en Bo vertrokke van ut eier ète.

18 november, krek un wèk latter was ut jaorlukse vorsteraodsbal. En umdat ut ok ut jubileum van de vorsteraod zelluf was, was ut un quasi-gecombineerd jubileumfiëst en vorsteraodsbal ien Ysselsteyn. Lang verhaal kort, wej mosse belacheluk vroeg daar zien, achteraf gezien umdat ze dan nog mier optrejes ien ut programma kosse frotte. En umdat ut Ysselsteyn is stonde we ien un net iets gröttere hal dan normaal, mit net iets mier artiëste ien un net iets grötter programma, en de vorste stonde op un net iets grötter podium mit unne net iets gröttere catwalk, en nie alliën grötter, ok högger. As ge wot stagedive hadde un parachute nuëdig.

De vorste gleje tiejes hunne speech over unne achtbaan, en ut programma liep moj dur. Noaderhand hadde nog un iets gröttere groep die hun liedjes van de aovend dervur nog es unne kier dun, en daornao de band Sjanté. Drie prinse die waon stagedive ware hunne parachute

vergète, de lèste twië han geluk dat ze baovenop den urste viele, den urste, uut Câtele, vond dat nie zo fijn. Wat hej wel fijn het gevonde was dat de hiële raod van Câtele te hulp schoot, want ut was toch wel vrej ernstig. Oh neje wacht, de prins was toch bijna an vervanging toe dus behalleve de vorst, vurzitter en adjudante keek d'r nog nie èns iemes um. Tja, ut is niks en wert niks. Ut bleek latter dat den prins un paar ribbe gebroke haaj. We han zelluf ok un rib uut os lief, want al dat groëte grei mos toch betald werre van de consumptiepries van 3,10. Uuteindeluk was ut wel wer unne gezellige aovend, en ginge we daornao mit de bus wer terug naor ut moje Oeldere.

Zondag 19 november was de vorstwissel ien Câtele. Daor hebbe we gezien hoe Vorst Roel wier gewisseld vur Vorst Jelle. Ut programma was un hiël del gepraot: Roel wier bedankt, en zien muts afgenome. Daornao kwame wat vraoge, en kwaam Jelle tevurschien, en hej kwaam op zien Câteles uut, vanachter ut gordien. Hej haaj d'r zin ien, en nao ziene speech voond ie ut tied um te zoepen. Oh jao, en polonaises loëpe, zèj d'r nog achteran. We zulle zien hoe dit uut göt pakke.

Zaoterdag 25 november was 's middags ut jubileum van de jeugdvorsteraod. Alle groëte prinse, prinsesse mit vorste ware uutgenuëdigd. Helaas ware wej de ennigste die dizze memo han gekrege. Ozze alde en neje vurzitter hebbe hier dizze middag wel kank wèrm gestókt, en we hebbe lekker cola gedronke vur unne euro. Helaas golde die bonne nie vur 's aoves, want toen was ut jubileumfiëst van de Zagewetters. Daor ware gelukkig wel mier andere veriëninge ien de netjes angeklejde loëds. Ovver netjes anleje gesproke, Robert, haaj bijna iederiën zich hier ok wer netjes angeklejd. Uiteraard stonde ien Mèrsele de Rostenthaler op de buhne, en ok nog unne kier Bjorn en Mieke. Ok dizze aovend was d'r unne vorstewissel, vorst Ruud miek plats vur vorst Bas. Ut was unne gezellige aovend, waor we uuteindeluk keurig netjes op tied de bus ien ginge, umdat prins Mark en prinses Bo gelukkig nie nog tigge de hiële zaal afzonderluk hoje hoefde te zegge.

Zondag 26 november zien we naor de Vöskes ien Mieldere gewist, want die han jubileum en die ware ok al dukker bej os gewist. Daor stoond Richtig Spiet, en ut was un gezellig fiëstje, mar naor un volgepland weekend han we afgesproke dat we nie al te laat naor huus zun gaon. Wat we alliën ware vergète is vast te stelle wannier exact "nie te laat" is. Joep haaj de knip, en nao de derde kier ienlegge vond de vorst ut wel moj gewist. Toen d'r uuteindeluk nog un reundje gratis was geschojd bej ut barpersoniel en we eigeluk al minimaal 2 uur latter weg ware dan eigeluk enigszins gepland, zien ok de prins en prinses vrejwillig mit naor huus gegaon. Of misschien haaj ut ok te make mit de volgende woorde van de vorst: "De mantels gaon nou mit d'n auto ien, en as gillie d'r nie mer ien zit motte naor huus loëpe"

9 december zien we nog naor de Sterreparade ien Berge gewist. Ut was ut lèste fiëstje van prins Mark en prinses Bo, en ien tegestelling tot andere jaore was ut programma hiëlemol nie slècht, de muziek was bèst goed (behalleve Bjorn en Mieke) en ut het Vorst Jop dizze kier mar iën vèr gekost. Uiteraard is de prinsemantel en muts wer alvast bej toekomstige prinse umgehangen. Of ja, bijna, want wat toen nog bijna niemes wis, is dat we op stap ware mit zowel ut alde as ut neje prinsepaar. Uuteindeluk ondanks dat ut binne ongevèr 140 graode was toch unne gezellige aovend, en naoderhand is d'r ok nog eier gegète bej de prins en prinses.

31 december was ut prinsraoje, dizze kier ok mit routes vur den boët vanwege de règen al die daag dervur.

Zondag 7 jannewarie, de prinseproclamasie. Ut was al gelijk druk, dus mar goed dat we ut aftreje ien de zaal han gepland. Prins Mark en Prinses Bo wiere toegesproke, krece de proclamatie uitgereikt, Petra Raijmakers kreeg un bluumpke vur ur moje wèrk, geregeld dur de vorst, die ekkes vergète was dat urre meens allergisch is vur bloeme. Ach ja, ze hebbe nog un wèk of 3 moj ien un vaas bej de vorst tuus ien de keuke gestaon, en Merel was d'r blie mit. Uuteindeluk moog Prins Mark nog iëne kier speeche, en gelukkig duurde dizze speech nie zo lang as ziene vurrige. Toen ze wer gewoën Mark en Bo ware het de APK en EPK ze opgenome bej de clubs, ze mosse hiervur nog wel ekkes laote zien hoe goed ze mekaar kende mit ut schoenespel.

Daornao was ut op ut podium te doen. De commissie haaj zichzellef wer overtroffe. Op de bühne stond ozze Spurriebot, waar al ut iën en ander ovver ien ut krèntje haaj gestaon. An de ziekant honge scherme waar ge krek op kost zien wat de Spurriebot an ut doen was. Vorst Jop stelde un paar vraoge waar de Spurriebot keurig antwoord op het gegève. Mar toen d'r un vraog ovver de toekomst kwaam, sloeg de Spurriebot op hol. De printer spejde de 11 regels uut, Vorst Jop laas ze vur, en daar stonde ze: Jeugdprins Merlijn en Jeugdprinses Sam. Nao hun speeches ginge ze ien de nek en ien unne groëte polonaise. Un tiedje latter ging ut op de buhne wer verder. Urst wier same mit de jeugdprins en prinses de mök iengezègend, en daornao ging ut vraoge stelle wer dur. Nao wer un paar goeie antwoorde begos de Spurriebot wer vur zichzelluf te dènke, en hej gaaf nog unne kier 11 regels an de vorst. Nao ut vurlèze kwame van achter de tillevisies Prins Stan en Prinses Dione de buhne op. Nao ziene urste speech ginge ok zej ien de nek en vervolleges ien unne polonaise. Nao de polonaise krece ze gelijk unne camera ien hun gezicht en stelde Rob Closses van Umroep Venroj um un paar onmeugeluke vraoge. Toen de hiële familie was opgetrommeld en ut langzaam latter wier zien we nog ekkes naor de soës gewist en daornao eier ète bej Stan en Dione thuus, waar zej d'r achter kwame hoeveul meense d'r eigeluk ien hun huuskamer passe, nameluk veul. Daornao wer terug naor de huuskamer, waar ut feestje nog unne hiële tied durging, en ok un antal raodsleje wer wat instrumente gevonde hebbe um un sirrenade te gève.

13 jannewarie was ut Ald wieverbal. Ut was ok alwer op tied druk, en gelukkig han we un goeie band, nameluk Richtig Spiet. Iederiën was moj verklejd, bijna iederiën haaj zien Roëj gèl gruune strikske an, en uuteindeluk ginge de Heftrutjes d'r mit d'n urste pries vandur. Ien de pauze hebbe prins Stan en Prinses Dione ok nog hun eige liedje gezonge: Pizza Confetti. D'r ware ok nog 3 andere veriëninge op bezuuk, en die hebbe zich bijna keurig netjes gedrage. Ut was wel fijn dat de prins van Câtele de vorst van Câtele het gezeet dat hej niks te zuuke haaj ien de soës en de soësmök nie kapot mos make. Ut is niks en ut wert niks. Nao Richtig Spiet hebbe Baart en Tim nog wat muziek gedrèjd. Wat ze nie han motte doen is de vorst van Câtele nog unne microfoon gève um hallef 2, want ok mit unne hoëp bier ien de nek kwaam d'r wennig nuttigs mer uut. Gelukkig wier dit afgekapt dur os twedde volkslied "Câtele is slècht", iengezet dur Frank Steeghs. Ut was unne gezellige aovend waar we os goed vermakt hebbe, en naoderhand zien we eier wiste ète bej de vurzitter, waar ge un goed straf bekske koffie kost kriege as ge nog nie waot gaon slaope. Iënmaol thuisgekome stond d'r Vorst Jop nog un vervèlende verassing te waachte, mar gelukkig dènke we gewoën ien oplossinge.

Vrejdag 19 jannewarie zien we naor Circus mök gewist, waar ok Oelders eige Frank Steeghs op het getreje. We ware daar wer op den diknekkeaovend, dus wej han os wer vurbereid op unne hoëp snacks naoderhand. Ut programma was ga nie slècht, wat dans, wat stukskes, en UCHE, nog unne UCHE, Buutreedner den UCHE, ok kettingroëker was. Daornao naor de roëje doës waar wej tacties ien de snackanvoerroute ginge staon, mar helaas kwame die nie. Naodat we dat es naogevraogd han bleek dat die vurrig jaor eik ok ga nie vur os bedoeld ware. Ondanks dat was

dizze aovend toch bèst wel geslaagd, en is d'r nog un klèn select gezelschap bej de prins eier wiste ète, ma nie vurdad, zoëas mej is verteld, os prinses nog de busschauffeur angevalle haaj.

Zaoterdag 20 jannewarie, de dag van de recepties. We begosse al 's middags bej de receptie van Prins Bas van de Köttepröpkes, ik bedoel Piëlhaan. Wej zun mar ekkes gaon, mar dat is nie gelukt. Ozze prins haaj ut thuus al wèrm dus hettie ziene zwarte jas onder de mantel ma nie angedaon. 's Aoves ginge we naor Câtele, waorum wet eigeluk niemes, mar ut was wel un moje gelegenheid um ut Wc-papier terug te gève. Wej waon nie gaon, wej bleve nie lang... en dat hebbe we ok nie gedaon en zien we gauwèchtig naor 't Vaöle gegaon, waor de receptie allang vurbej was, mar ut fiëst nog lang nie. Ut was gruweluk wèrm en gruweluk vettig binne, en de vloer waar un schetsbaan, mar ut was wel gezellig, en d'r ware iets van 7 veriëninge op bezuuk. Naodat ut daor vurbej was, zien we nog ekkes bej Lotte Closses eier en ander grei wiste ète, en tigge den tied dat de urste op de bank ien slaop begosse te valle zien we toch mar naor huus gegaon. Ien plats van wer mit 8 man bej vorst Jop ien d'n auto te klimme hebbe we os op de terugwèg mar wel verdèld ovver de auto's, naodat we nog wel ekkes al ut ald papier baovenop unne dichte bak han gegooïd.

Vrejdag 26 en 27 jannewarie ware de Bonte Aovende.

De vrejdagaovend begosse we mit de opening, en metiën wiere Han en Elma ien ut zönneke gezet. Urst dur de Spurriemök en daornao dur de vorsteraod, die Han de orde van de Zilveren Spurriemök en de orde van de vorsteraod hebbe uitgereikt vur zien 11 jaor bej de raod en bestuur. Toen dat gediëlte vurbej was kos ut programma beginne.

As urste kwaam de Zombie Crew ut podium op, en mit hunne dans hebbe zej den toën gezet vur d'n aovend. Daornao han we nog un spelleke mit de vrienden van Lingo live, oftewel Oeldere tigge Câtele ien un spelleke waor ge slim mot zien, 3 x raoje wie d'r gewonne het.

Daornao was de jeugdoraod mit prins Merlijn en prinses Sam an de beurt, en wej mosse raoje wie van de jeugdoraod achter welleke maskers zate. Wat blijkt nou, prins Stan en prinses Dione ware op de urste aovend slimmer dan ut ganse publiek op den twedde aovend! De jeugdoraod sloot af mit hun eige liedje, geschreve dur Moeke Mieke.

Daornao kwame Amiesenkaal op ut podium, want Herman zocht unne Blind Date, en zien bruur zeuj um daor wel es mit hellepe. Vurral de urste rij wier goed betrokke ien hunne zuuktocht.

As lèste vur de pauze was ut tied vur S.L.E.D. En dat stöt vur Sander, Luc, Edwin en Daan. Zej han un drumstel ien viere gedèld, lempkes derien gemakt, en wer het de slagwerkgroep iets gedaon wat wej nog noëit gezien han, moj gedaon.

Toen was ut tied vur de pauze, en ien de pauze wiere lötjes verkocht vur ut team wat mit göt doen an Alpe d'Huzes. Umdat hier unne hoëp leje en ald raodsleje van os veriëning an mit duun, hebbe wej as Spurriemök hiervur un moje bejdrage vur bej mekaar probiere te verzamele, en uiteindeluk hebbe wej ok nog unne moje cheque kunne overhandige un wèk latter.

Nao de pauze stond de Mök is Los ienèns veuraan op ut podium. Zej han un ope sollicitatie van Mark Steeghs gehad, en dit was zien debut. Uuteindeluk klonk ut zo goed dat hej gelijk is angenome.

Vervolleges kwame d'r un paar alde bekende op de bühne. Ien hunne auto van L1 en L2 ginge Marco en Peter onderwèg en aoveral nève um te vertelle. Ut was as vanâlds gewoën goed, en we hope uiteraard dat ze dit nog veul dukker gaon doen.

Toen was ut alwer tied vur wat alde bekende, nameluk Hart van Oeldere. Nao un groëte wereldreis ware ze terug ien Oeldere um hier os allemaol ut lèste nejs te brenge ovver iederiën

den wat haaj uitgevrète, of juist nie, en ovver sloopkogels (en nieje dat pletje kan ik nie ien dees keurig nette prizzentasie zette). Moj gedaon, dur Tim, Jesper, Cas en prins Stan.

Daornao han we nog unne buut as ienvaller, en hej vertelde os ovver waar hej allemaal al es oëit vur iengevalle was. Hej kos ien ieder geval gen nèè zegge.

En op beide aovende was den afsluuter de APK, mit Oeldere ien beweging. Vincent ging veurop um iederiën ietskes fitter te kriege, en den meens het zoveul energie dat achter um de meense halleverwege gewisseld mosse werre. En hiëlemol op ut lèst wier d'r nog iemes uut de zaal geplukt um ok mit te doen. Op de vreedag was dit Prins Stan. En den deuj ut eigeluk hartstikke goed. De zaoterdag... tja, eigeluk zegge beelde 100x mier as woorde... Wej gaon hier niemes ien de zeik zette dus de persoon ien kwestie is onherkenbaar gemakt. Helaas vur um bin ik daar nie zo goed ien.

Beide aovende ware uutverkocht, en ut was daornao ok nog bèst lang gezellig, kortum, wer twië geslaagde aovende, en op iëne aovend zien we nog bej jeugdprins Merlijn eier wiste ète. Den lèj wel al un paar uur op de bank te slaope, mar hej het toch gewoën zien pekske wer angedaon en mit eier gegète.

Zondag 28 jannewarie is de prins urst efkes op de foto gewist mit de jeugdvorsteraod, en daornao zien de prins, prinses, vorst en Daan (nao 10 minute nie geslaagde expeditie Mark), naor Siebelgewiebel gewist. Urst naor ut voetbal gekeke want Prins Stan zien team stoond daar te balle. Althans dat zen ze, mar as ze Daan en Jop han wiesgemakt dat ut synchroonzwemme was han we ut ok gelöft, al was ut dan wel tameluk druëg. Daornao naor de receptie van de Bessembienders, want de zus van de tante van de achternèf van de derde meens van un kennis van de buurman van de moeder van prinses Dione was daar ok prinses geworre en das un goeie reje um te gaon. Op zondag. Um 11 uur smerges. Ut was bèst moj um te zien, mar wej mosse rap wer terug vur de jeugdbontemiddag. Daar kwame ontzettend veul kiender uut Oeldere en Câtele op de buhne, die un dansje dun, of unne buut, of iets anders, ut was ien ieder geval moj um te zien dat de groëte Bonte Aovende ien de toekomst ok gevuld zulle blieve. Wer unne geslaagde middag.

's Aoves was der nog jubileum ien Geijstere. Mar daar waon we nie hin gaon. Uuteindeluk hebbe un stel remmels toch ozze Prins Stan wiëte aover te hale, ondanks dat we al un paar lange daag achter de rug han. Mar goed, die remmels wiere vervolleges wel verplicht um ok mit te gaon. Nao mit un man of 10, of misschien ok wel 3 kier zo veul, gegète te hebbe bej Rinie en Rian (as ge wist waar ze wónde), ginge wej vol goeie moed, en mit unne volle pèns naor Geijstere. Daar was ut nog goed druk, mar ut was wel un hiël eind de afterparty. Wej liepe bèst wel veul aachter qua promillage, mar de vorst was blie dat ut nie zien raad was die zich daar lèj te misdrage. Mar goed, uuteindeluk hebbe we wel wer gelache, en we hebbe nog ekkes un raodslid van de Kaevers zien boks wer mit tape anèn geplekt, want den was d'r ram uutgescheurd. Naodat de knip leeg was zien wej dan ok wer gescheurd, mar wel naor huus.

Vreedag 2 fibbrewarie zien we naor ut Ald Wieverbal ien Câtele gewist. Daar stond Richtig Spiet, dus we wisse wat we kosse verwaachte. Ut was unne vrej gezellige aovend, uiteraard umdat wej d'r ware, en uuteindeluk zien we nie al te laat wer naor huus gegaon, mit un Oelders/ Câtele verstekeling die ur sleutels, earpods en wiët ik wat allemaal kwiet was.

Zaoterdag 3 fibbrewarie was 's middags de krantverkoëp. Ut was wer unne mojje krant volgens bijna iederiën, den we dit jaor eindeluk vur 7,50 kosse verkoëpe umdat Rob d'r niks mer ovver te zegge het. Of ge most geluk hebbe um de 3-euro-qr-code te hebbe betald. Gelijk aansluitend zien Stan, Robert en Jop de cheque af wiste gève, en daornao metiën dur naor Rooj vur de

prinsefoto, waar wej netjes op tied ware, ien tegestelling tot de prins van Rooj (snuuf), den naoderhand aoveral bej gefotoshopt is geworre.

Daornao ekkes naor huus, um vervolleges wer rap naor de Liende te gaon vur de prinsereceptie, waar iederiën te laat was. Ysselsteyn was d'r al um kwart vur 7 ien verband mit hun eige programma. Nao de sirrenade begos de receptie, en zoëas elluk jaor zien familie, vriende, kennisse en veriëninge nevw de prinse en prinses gewist vur un hëndje, ien de zaal waar ut ga nie wèrm was. Ok de Worteleschrabbers kwame mit un delegasie, zej han un intronummer mit vlagge en den hiële santekraom, en un moj woordje vur de Stan en Dione. Klein dingetje, hej noemde os wel stug de Spurriemökkers. Kleinigheidje.

Umdat wej ien Siebelgewiebel ware gewist, kwame ok de Bessembienders nog nève, die mit de huufkar 1,5 uur naor Oeldere ware gereje, en onderwèg ok nog ekkes ien Well de prins en de vorst han opgepikt. De vorst kwaam mit un hiël verhaal over dat zej wel mit veul man bej os ware en wej nie bej hun. Ter compensatie han wej os daor wel keurig netjes gedrage, en dat koste van hun nie hiëlemol zegge. Ze han de hesjes van de obers gevonde, de Soësmök bijna mitgenome, de schuufdeur gesloopt en uiteindeluk ut brandalarm af laote gaon mit de Hanmelder. Mar goed, ut fiëst was zeker geslaagd, en ut is, zoëas we dit seizoen eigeluk al bijna gewend zien, moj druk gewist. Wat wel opviel, was dat as ge te dicht bej un bepaald raodslid stoond ge kost ruuke dat hej uut ziene moel stonk alsof d'r un kat ien haaj ligge jonge. En un ander bepaald raodslid waoj 's nachts nog ekkes laote wiëte dat zien portemonnee leeg was.

Zondag 4 fibbrewarie was de jeugdreceptie, tenminste, as ge ow nie verslaope hat. Ok vur de jeugd ware d'r vriende, familie, kennisse en veriëninge die ekkes nève zien gewist um un hëndje te gève an Jeugdprins Merlijn, jeugdprinses Sam en de jeugdraod. Uiteraard huure daor ok wer wat fillemkes en toesprake bej. Zellufs ut jeugdtrio van Rooj was nève gewist, mar as ge toevallig mit de oëge hat geknipperd hedde dat gemist.

's Aoves was ut os beurt um op bezuuk te gaon bej de Worteleschrabbers ien Bookend, umdat unne collega van Stan daor adjudant was geworre. Ien un vrej klèn zaaltje mit unne joekskapel mit zanger wier de receptie gehalde, en umdat zej dat bej os ok han gedaon kwame wej toen we an de beurt ware ok binne mit vlagge en ut prinsenummer. Ok noemde ze os daor nog steeds de Spurriemökkers, mar goed, nie gehinderd dur enige vurm van vurbereiding noemde vorst Jop de vorst van hun ok gewoën Patrick, terwiel die daor schienbaar mit de vastelaovend "Raspedorius" hiet. Kleinigheidje. Nao un kort woordje zien we nog ekkes de zaal ien gegaon, mit eigeluk as plan um un paar pilskes látter naor huus te gaon. Dat is precies nie gelukt. Toen de elledge receptie mit 100.000 "korte" weurdjes vurbej was kwaam La Bamba. Vuruit, kieke we die ok nog ekkes af. En daornao kwame we der achter dat ze daor wel muziek van nao 1970 kenne, en wier ut zowaar ok nog gezellig ok, mit nog un heus luchtgitaar-riek optreje van alle prinse. En naodat de knip leeg was en we d'r nog unne van ut huus han gehad was ut moj gewist, en zien we wer naor Oeldere teruggegaon, naor ut Spurriemökkersland.

Woensdag 7 fibbrewarie was de JVV-aovend 86.0, en ut begin van de vastelaovesmarathon. Hoewel de afgeloëpe jaore ut moeiluk was um volk bejen te kriege, ware d'r dit jaor mar liefst ruum 70 anmeldinge. D'r zien toch veul meense 50 geworre afgeloëpe jaor. D'r stond un moj programma, Prins Stan en prinses Dione stelde zich tradisiegetrouw vur, en toen kwaam de verrassing vanuut de commissie. De opa van Stan, wier uutgeroepe tot JVV-Prins Jan! Nou han ze echt 4 generasies prinse ien de familie, en d'r wiere duchtig foto's gemakt. Prins Jan het ok nog unne buut gehalde, althans dat was zien weurdje wel. Verder op ut programma nog unne troubadour, twee buutreedners, ut liedje van Stan en Dione, en as afsluuter dit jaor Waldina

Jacobs. Nurges was tekort an: entertainment, vlaai, drinke, hapjes, en vurral gezelligheid. Dit was ien van de drukste JVV-aovende die we sinds hiël èrg lange tied gehad hebbe, en hopeluk kunne we dizze lijn ien de toekomst vurtzette. De aovend is mede zo goed verloëpe umdat we ok unne hoëp hullep han van de vrollie van de raod, en ien van Han zien dochters, nameluk Elma.

Donderdag 8 fibbrewarie was de SJMO-carnaval, waor we ok dit jaor wer ekkes un bezuuk an hebbe gebrocht. Normaal gaon we daornao nog iëne drinke ien de kroeg en op tied naor huus, mar umdat Swolge bej os op ut Ald Wieverbal was gewist, mosse we daor ekkes naor de Sportparkprinsdinguutkomme op ut Sportpark. Gelukkig was d'r binne niks van te merke dat d'r buute mèj gesport wier, dus ut was bèst gezellig. We hebbe os daor bèst vermakt, wat polonaises geloëpe, gebuurt, te huure gekrege dat de prins en prinses van Swolge eigeluk ien Oeldere waon komme wone, knip leeggemakt, en wer naor huus toe gegaon.

Vrejdag 9 fibbrewarie was de schólcarnaval, dit jaor ien Oeldere. Ut begos mit unne mojje optocht dur de Oelderse straote, en ansluutend un fiëstje ien de Liende, waor zellufs onder andere Van Lieshout en Arts hebbe opgetreje. Ok het ozze prins nog tigge de Cêselse prins un spelleke motte doen, en dat het Sem uiteraard gewonne dur vals te speule. De jeugd was ien ieder geval hiëlemol opgewèrmd vur de carnaval. Toen de kiender naor huus ware hebbe we d'r nog iëne of mier gedronke ien de huuskamer, en 's aoves zien Prins Stan en prinses Dione nog ekkes op ziekebezuuk gewist bej Lars Geurts, want den haaj oerpien.

Zaoterdag 10 fibbrewarie begosse we mit opbouwe, en daornao nie naor ut klènste mökske, want die was nie tuus, dus mar gelijk naor de installasie ien Rooj. Dit jaor was ut wer ien ut gemèntehuus, en as wej ierluk zien vonde we dit eigeluk ok prima. Ut programma was kort mar krachtig, en daorum kosse we redeluk op tied naor de Roetsj. Ut was wel jommer dat iederiën daor mit un lang gezicht stoond te kieke, mar de vorst mos en zeuj veuraan staon ien de drukte. Verder was alles goed geregeld, de cola en draagtrays ware nie op, en ge kost zoë naor de plee die nie gek wiet weg lèj. Ut programma was werelds mit allemaol topartieste. De lèste 3 zinne zien trouwes geloge.

's Aoves was ut mökkebal. Ok hier was ut wer goed druk en ok èrg gezellig mit de band Sjanté. De vastelaovend wier geopend naodat Mario Trappatoni de medaille was komme brenge ien un doës vur pizza quatro Standioni. Ut fiëst was gewoën goed, en an ut eind van de aovend kwaam, volges Stan, de grötste verrassing van de vastelaovend: De familie van Prins Stan en Prinses Dione han d'r mit verkrachte eende, of vereende krachte, vur gezurregd dat d'r ien un uurke 130 pizzas gebakke ware, die goed gegète wiere ien de zaal. Dit was un eenmalige uitzondering op de gebakke eier, mede ok umdat dit toch al gauw 2 BHP mier het gekost dan eier. Mar dit jaor kwaam ut zoë prachtig uut. De aovend was alwer geslaagd, en alwer druk. Zellufs um kwart vur twië kwame d'r nog un paar binnegefietst. Nog wel noemeswaardig, Prinses Dione het ut eindeluk vur mekaar gekrege um Joep un Ratteval terug te gève, toen ze bej um op de nek zaat. Nou wet den ok es hoe dat vuult.

Zondag 11 fibbrewarie begosse de Prins, Prinses en Vorst bej ut jongste mökske, dit jaor James van Mikey en Lieke. Daornao begos d'n optocht, den dit jaor eigeluk zo lang was dat de fotograaf nie alles ien iëne kier op de foto het gekrege. We han zellufs gate ien d'n optocht. En vur wie docht dat we allemaol neje nummerbordjes han laote make: Bovve nummer 7 ware eigeluk gewoën nog nie gebruikt. DJ Mojito Team, de kleine pizzabakkers, vrouwe mit balle en Mr en Mrs Sushi viele ien de prieze. Daornao is dur Jeugdprins Merlijn en Jeugdprinses Sam ut jeugdbal geopend, en is ut fiëst moj an de geng gegaon. De middag wier opgeluusterd dur DJ Ruud, en

Nevvenen is ok nog nève gewist. Eigeluk zun we, nao Mel urre goulash, rond un uur of 8 naor de soès gaon, mar daor zien we ietskes latter en langer hin gegaon umdat knolbeat daor un optreje haaj. Daornao ien de Huuskamer mit DJ Roel is ut nog tot 2 uur durgegaon.

Maondag 12 fibbrewarie begosse we mit ut snotneuzebal, waor de allerklènste wer alle ruimte kreges um rond te renne. Toen de ballonne ware gevalle kosse we allemaol ekkes wat ète, waornao we ien twië busse mit un man of 160 op weg ginge naor d'n optocht ien Rooj. Ien den Oelderse bocht was ut biëstig gezellig, en we ware hóst angezope. Utzellufde gold trouwes op de wage, want de shotjestas was wer un hiël eind leeg. Meense die koffie waon han wel un uitdaging um d'r mellek ien te kriege, want stuufkoe as ut wèjt is nie hendig. Naodat we wer verzekerd ware van de urste pries van de Oelderse jeugdprinsewages zien we wer mit zien alle terug gegaon naor de Liende, waor we nog getraktierd wiere op un optreje en un brödje döner. Naodat we nog ekkes naor de soès ware gewist en ut tietelied wer mit han gedaon ging ut feestje dur ien de huuskamer, mit twië Pinterkloaze, oftewel Robert en Willem. Zej han wer unne hoëp flauwekul en grei bej um de meense te vermake. Ut was wer èrg gezellig, alliën wel jommer dat iën van de twië, ik zeg nie wie mar hej het wel flapoere, al um KWART OVVER 1 de pin derien woj houwe. Naodat hej es ekkes ien de rej was gezet dur Tiemke hettie toch mar durgedrèjd tot 2 uur.

Dinsdag 13 fibbrewarie was urst den brunch. Dat smiek wederom goed. Daornao was vrej snel de BBZ, waor un hiële rits an ervare en onervare artiëste op de buhne hebbe gestaon, waaronder natuurluk de familie en kammeraöj van de prins en prinses en de jeugd. Ok dizze middag was alwer mit un goed programma, verliep hartstikke goed, en was wer goed bezocht. Mar goed dat ut schot van de catwalk ien de verkierde kleur was, anders han we hiëlemol niks te zeike over dit seizoen. Dit jaor wier de BBZ anèngepraot dur Roel. Toen ut programma was afgeloëpe was ut alwer gauwèchtig tied um ut jeugdbal af te sluite. Jeugdprins Merlijn en Jeugdprinses Sam kreges van Pascal de proclamaties en moge dees vurlèze. Daornao moge ze nog iëne kier ien de nek ien unne groëte polonaise, en daornao de soos ien. Wej zien ondertusse verhuusd naor de huuskamer, en rond de klok van hallef 10 zien wej mit un delegasie naor de soès gewist um daor af te sluite. Maik en Kyra ware daor an ut optreje, en daornao nog iëne kier speeche, medaille ophange, foto make, en mit zien alle naor buute um de soësmök ien de fik te stèke. Vastelaovend vur de jeugd zoot derop.

Toen snel terug naor de overvolle huuskamer, waor DJ 1,5 Seks on the Beach stoond te drèje, en waor we rond hallef 12 begosse mit de woordjes vur de stoppers, naodat we nog wat medailles han uutgereikt. Amber, die stopte as dansmarietje, kreeg de orde van de Spurriemök uutgereikt. Han, Fred, en Rob stopte alle drie bej de raad nao 11, 12 en 13 jaor. Lèstgenoemde trekt trouwes eik alliën zien pak uut, de rest blijft ie bekant gewoën doen. En ozze vurzitter Robert ging zien bestuursmuts ok nao 15 jaor an de wilge hange, en hej het ok nog un woordje gericht op de raad en bestuur. OK stopt hej bej de Mök is Los, en het daor ok nog un moj andenke van gekrege. Toen was ut de beurt nog an de prins, en ietskes latter as gepland ginge we naor buute um de prins en prinses te ontdoen van hun versiersele en de mök te verbrande. Uiteraard ging ut ien de Huuskamer tot un uur of 4 dur, waor we gelijk begosse mit unne pul bier of ander grei, en we hebbe nog veul gelache en gefiëst. Toen de prins en prinses wer es unne kier ien de nek ginge, en daornao wer netjes nergezet wiere, len we allemaol ien un scheur, en Paul zien boks ok. Die was nog wel te repariere, mar Han en Rob waon toch nog dervur zurrege dat ozze penningmèster 0,5 BHP uut mos gève an un neje boks vur ozze toekomstige vurzitter.

En zoë kwaam d'r ok un eind an dit vastelaovesseizoen, mit Prins Stan en Prinses Dione, un èrg kort seizoen, mar eigeluk op alle bals en alle fiëstjes un groët succes.

Dit was ut jaorverslag van V.V. De Spurriemök, seizoen 2023-2024.